

**Hadi Tutup Mulut Calon Pengganti Hasan Ali
mStar Online
Januari 15, 2012
Oleh ARIFFUDDIN ISHAK**

ALOR SETAR: PAS masih berteka-teki mengenai calon pengganti Datuk DrHasan Mohamed Ali yang dipecat daripada parti itu bagi mengisi kekosongan jawatan Exco Kerajaan Negeri Selangor.

Malah Presiden PAS, Datuk Seri Abdul Hadi Awang turut mengelak ketika diajukan soalan mengenai pengganti bagi mengisi portfolio Pengerusi Jawatankuasa Tetap Hal Ehwal Islam, Adat-Adat Melayu, Infrastruktur dan Kemudahan Awam.

"Nanti kami beritahu, tunggulah Rabu," katanya ringkas kepada pemberita selepas sidang media bersama pemimpin Pakatan Rakyat di sini, Sabtu.

Abdul Hadi juga mengelak ketika ditanya sama ada beliau sudah mengadakan perbincangan dengan Menteri Besar Selangor, Tan Sri Abdul Khalid Ibrahim berhubung pengisian jawatan itu.

Pada Jumaat, Abdul Khalid mengumumkan bahawa pelantikan Exco baru akandisempurnakan di Istana Bukit Kayangan, di Shah Alam pada Rabu depan.

Abdul Khalid turut memberitahu bahawa kerajaan negeri belum memperoleh nama secara rasmi daripada PAS dan satu perjumpaan dengan PAS Pusat akan diadakan dalam tempoh dua hari ini.

Hasan digugurkan daripada jawatan Exco Kerajaan Negeri Selangor oleh Sultan Selangor, Sultan Sharafuddin Idris Shah.

Walaupun memaklumkan pembatalan pelantikan beliau akan dihantar oleh pihak istana kepadanya tidak lama lagi.

Minggu lalu, Abdul Hadi mengumumkan pemecatan Hasan berikutan tindakannya yang didakwa menyalahi dan merugikan parti berdasarkan kepada Fasal 82(9) perlembagaan parti.

Hasan sebelum ini dianggap sebagai 'ancaman' kepada PAS berikutan kenyataannya secara terbuka mengkritik perjuangan parti itu yang dianggap tersasar daripada landasan perjuangan asal parti, iaitu mendaulatkan Islam.

Hakcipta Terpelihara © 1995-2012 Star Publications (Malaysia) Bhd
Source:

http://mstar.com.my/berita/cerita.asp?file=/2012/1/15/mstar_berita/20120114144453&sec=mstar_berita